



29. April 2019

UPA 2019/167  
Aqqalu C.Jerimiassen

**Apeqquteqaat aallaavigalugu oqallinnissamik siunnersuut, qanoq iliorluta ilinniartitsisut sulinermi atugaasa pitsanngortinnerisigut atuartut ilikkangaqarnissamut periarfissaat pitsanngorsarsinnaavagut.**

(Inatsisartunut ilaasortaq Peter Olsen, Inuit Ataqtigiit)

Meeraanikuuvugut tamatta, tamannguattalumi misiginikkuarput atuartuunermi aqputit assigiinngitsut nuannersut, nuannerpallaanngitsut, meeraqatit qasunartut ilinniartitsisullu naveersinikkaat.

Oqallisissiamilli qaqitaqartup ersersinniagaa ataaseq annertuumik assortoruminaappoq, tassalu illoqarfinni annerusuni meeqqat atuartut aqukkuminaassinnaasernerat annertuumik ajornartorsiutaalersimasoq. Immitsinnut eqqaasittariaqalersimannginnerpugut ullutsinni, sooruna meerartagut taama inersimasunut utoqqartaminnullu ataqqinninnerat appasitsigisoq?

Ersiutaalersimannginnerpa ullutsinni arlaannik pisussaaffinnik angajoqqaajusutut paatsuugaqarsimannginnerput? Utikulunneqartaqaaq “Meeraq pisinnaatitaaffeqarpoq”, aap! Nalunngilarput meeraq pisinnaatitaaffeqartoq, kisianni sangutinneqartariaqanngilaq sunik tamanik meeraq akisussaaffeerullugu ingalaamininnguatut aserujasutut mianerinissaa. Tassani angajoqqaat tassaasussaapput meerartik qanoq killissaanik paasitissagaat. Meeraagallaratta nalunngilarput anaanarusakasitta killileraangatigut qanoq kamannartartigisoq, KISIANNI angajoqqaq asannittoq meeqqaminut killiliisarpoq. Asanninneq killiliineruvoq, ilaqtariit toqqissisimasut ataqatigiittullu tassaasarpud angajoqqaat paarsilluartut, isumassuisut meeqqallu killissaminnik paasitinneqartartut.

Ilinniartitsisut pisussaaffigaat atorfirminni meeqqanut atuartunut ilinniartitsissallutik, oqaannassallunimi ajornanngippallaaqaq ilinniartitsisut tikkuassallugit sullarlunnerarlugit meeraq sernissarniarlugu. Ilinniartitsisorpassuupput ullut tamarluinnaasa aalajaangaarlutik qasuttuillutik sulisunik, taakkuuppullumi annertuumik qutsavissaqarfigisagut meerartagut siunissamut isumannaatsumut aqputissiuunnarlugit sulisarmata.

Maanna uanga peqatipajaakkalu atuartuugallarnitsinni pissutsit allarluinnaasimaqaat ullumikkumut naleqqiullugit naak patitsittarnerit qujanartumik angumerinngikkaluarlugit, tassami taamanikkut naalanngilillaraangatta qatsussaalluinnarlutalu anisitaalaaginnartaratta qaatuumigaangattalu isertitaaqqittarluta teqeqqumut talitsitaallanngikkaangatta.

Maanna tusartalerparput meeraq atuartoq atuaqaterpassuani sunnertarai akunnerlu atuarfiusoq iluitsoq ilinniartitsisut atortariaqartaraa eqqissisarniarsarigaluarlugu tamaalilluni ilinniartitsinissaraluamini piffissarujussaq asuliinnartittoortarlugu, qangaanerusutuut anisitsisinnaaneq atoqqusaanngilluinnarmat ullutsinni. Oqaaseq annernaraluarpalluunnit isumaqarpunga uani qaqittariaqarippud, ajortumik ilaanni iliortariaqartarpugut ajunnginneq



annerusoq anguniarlugu, meerartatta amerlanerpaartaat angusarissarlutik pitsaasumik siunissaqarnissaat anguniagaraarput.

Ilinniartitsisugut qasuttueqalutik suliuartut ilaatigut ulluinnarni inuunermi annertuumik sunniuteqartoorsinnaanerat ingalassimatinniartariaqarparput, meerarmi ilikkarusuttoq tusaajumaangitsumik peqateqartualluni sunnertissinnaasarpoq tamannalu annertuupilussuarmi siammapallassinnaasarpoq ataasiinnarluunnit aallartitsigaluarpat.

Angajoqqaatut pisussaaffik pigisariaqagaq inuiattut isertittariaqalerparput, meeqqat atuarfianni sunik tamanik immaqa ilaatigut Europamiunut naleqqussarniarsarivallaarsimanitta akisussaaffimmik tiggummaaqaqarnersassaraluarput tammakartilersimavaa, ilami ajornaqaaq ullutsinni oqalaarfiunnginnamiluunnit, kisianni tassa malersungaasutut imaluunnit nakkarsarneqartutut misigaluni, tassa tamanna meerartatsinnut kingornussasatut takusassiassarput? Naak tamakku oqaluttarnepassuit taava siuaarsuagut pillugit tulluusimaaruterpassuit?

Atuarfinni klassimi ataatsimi meeqqat ikinnerutilerneqarsinnaanerannut isuma assut tapersernarpoq, namminerlumi tamanna misiginikuulluarpara iniarakasimmi 10.klassimi 22-iulluta qanoq ipiarruukusattarnikuutingaluta malinnaaniarnitsinnullu qanoq sunniuttarnera. Taamaammat oqallissarisut 18-inut tikkuussinera 18-20-illu akornganik annerpaaffeqarsinnaanerat eqqartungassaavoq soqutiginaatik.

Oqallisissiaq pillugu Atassummiik qujarusuppugut Peter Olsen-imut taamannak soqutiginarigisumik qaqitsimmat, suli eqqartugassaqaarsinnaagaluaqaaq, utikuluivallaalinninninilu Atassummiik tamaanga killipparput.